



Jubiläumsgschichtli für di chlii Bühni Schaffhause

Wemer grad so schön binenand sind hani tenkt ich chönnt eu e chliisses Jubiläumsgschichtli verzelle. Und zwor e bsunders rampeligs Gschichtli wo bem Theater am Herrenacker passiert isch.

Uh het da grumplet im Stilzli wo de Hotz am Plotz «Full monty» gange isch. Er het sich nu en Jux wele mache aber d Chatze hend sofort d Stiefel montiert, d Störch vom Kalif hend gflatteret und eine isch we voll uf Arsen mit em Spitzehüübli übers Kuckucksnest gfloge. Sogar de giizig Aladdin het sich nüm gsürt und usegheepet: «Me lebt nu eimol!» Für die fröhliche Geister isch das Ganzi de blutt Wahnsinn xi – s letscht mol hend si sich be de Peepshow vo Holzers ase amüsiert.

De Max und de Moritz hend hingege ehnder gfunde, es seg alls fürd Chatz - aber es Trixli het plötzlich gwüsst, wases will...

De chlii Muck het gleitig sini Zauberorgle füregnoh und de König vo de Frösch demit inen Summernachtstraum ineglullt. Döt het en ä alti Dame namens Knie bsuecht. Genau - die wo usem Kantonsroot Muff en verliebte Grossvater gmacht het. Ersch im Früehlig, nochdem s Wittli dur de Schnee gstapft isch, het de Frosch wieder siis erwache gha.

D Frau Holle hett bim Aablick vom Hotz am Plotz es Peterli am liebste sofort uf de Mond gschickt, aber de Pierre het druf bestande - ersch am 14.20. So hett si d Asche noch chli puttelet und nume de schlaue Chnecht Dromo het gemerkt, da do chönnted 10 Täg Gratisferie useluege, endlich Holiday in Switzerland. Er het scho mol ufs Niederdorf gschielet und sini letzte drei Grosche operiert. Ganz ohni Bürgschaft.

Uf e glückliche Reis mit Autostopp het denn plötzlich de eidgenoss Krättli aagfange scharwänzle und demit es Gretel gwaltig verhänslet. D Dorne vom Rösli hend si tüüf ine gstoche und d Welt isch ihre we ohni Himmel vorcho – d Warnig vor dem Hund het si nid erreicht - wege dere unsägliche Sach mit em Chnopf. Anstell vom panige Wunderschiff rings um d Welt - nu no Verroot, Steibruch, Schmuggler, Muratori, Streikbrächer. Da chunnt devo, weme sich wegeme biedere Ma us Verzwiiflig z früe für de Zauber vom Oz aameldet.



So verpasst es verhänslete Gretel wegem Hotz am Plotz all die Landstriicher, Suppeschüsseler, dildappige Räubertöchtere und ihri Peer i lange Strümpf weg somene chliine Prinz wo sich partout nid vo sim Gwüsse triibeloht. Nünt mit Zirkusoobetüür.

Di tapfere Rabe sind underdesse z siebte höch am schniiderle, häxed chli und mached em Jim sin Chnopf a de Loki ganz chribbelig, als hebis en Stromusfall. Natürli merked die siebe derwiil nünt vo dene drei am räuberle wo a de Trenk-i mit em Tüüfeli im Schlepptau e chli uschuldig umeritterled.

Chum het de Hotz am Plotz sin lebchuechige Pinocchel wieder ordnigsmäss mit em Babkin sim Buech vom Dschungel verdeckt, isches still worde nebem Acker vo de Herre. Als wäri allne gliichziitig d Stimm gstibitzt worde. S het corönelet. All sind hei – und de Hecht isch verbrennt.

Aber - s git Lüt, wo sägeded, dass siderem Hotz am Plotz d Türe wieder offe seg, wieder gspielt würdi und d Girls ufem Kalender seged i de imthurnsche Halle am Acker.

So söll da sii – au für di nächste 77 Johr.